

Èkwo-ozì,  
 Jiudu  
 Deru

<sup>1</sup> Èkwo-ozì-a bẹ shì l'ẹka mbẹdua, bụ Jiudu; onye l'ẹjeru Jizọsu Kéreshi ozi; bụkwarupho nwune Jiemusu. Ndu mu ede iya anụ bụ ndu ono, Chileke kuru bya emee ẹphe bụru ndu nkiya ono. Chileke ono, bụ Nna bẹ yeru unu obu; bya akwakọbe unu l'ime Jizọsu Kéreshi g'ọ tọ dụ iphe, e-me unu.

<sup>2</sup> Gẹ Chileke phụkwaaru unu obu-imemini; l'oomee g'ẹhu dụ unu guu; l'ooyekwaaphọ unu obu. G'ọ tuko iphe ono meeru unu; mbụ meeru iya unu k'anyinyi.

*Ndu ẹjo nzi*

<sup>3</sup> Ndu mu yeru obu; iphe, mu shì arị ẹ mu e-deru unu l'ẹkwo-ozì-a bụ k'adzọta ono, Chileke dzọtaru anyi g'anyi ha ono. Ọ gbẹ bya akachia ree ẹ mu e-dechia ya gude dọ unu obu; g'unu bya awata agbaru ekweta ono ọdzori; mbụ ekweta ono e yeru ndu-nsọ kẹ Chileke l'ẹka ono. <sup>4</sup> Iphe, mu gude epfu iya bụ l'ọ haru nweru ndu ta akwabẹdu Chileke ùbvù, tọru nwẹhu pyobata l'echilabọ unu; ẹbe a madu. Ẹphe anọduje ezi l'ọ dọ ree gẹ nemadzụ meje umere, rehuru erehu; eshinu Chileke bụwanu onye emeje eze-iphe-ọma. Ẹphe nọdu ajikaje Jizọsu Kéreshi ono, bụ iya bụ Nnajiuphu anyi kpoloko; bya abụkwaru iya phọ kpoloko kpẹkpu bụ onye gude ndzụ anyi. Ẹ teke ndiche bẹ e dehaakwaru iya rọ l'ẹkwo-opfu Chileke sụ ẹ Chileke a-nma phẹ ikpe iphe ono, ẹphe eme ono.

<sup>5</sup> Iphemiphe-a bẹ unu makọtabebehaakwaru ren-gurengu; ọle iphe, mu emelepho gẹ mu nyataru unu bu lẹ teke ndiche bẹ Nnajiuphu dzokwaru ndu nkiya teke ono, ephe shi buru l'alị Ijiputu ono. O meru ephe wufuta l'alị ono. Ọle ọ dzochakwaaru phe ono; e mechaelaa; o gbushielaa ndu ophu ekwedu nkiya <sup>6</sup> Teme unwu-ojozi-imigwe ono g'ephe ha; mbu ndu ophu, kwefuru ike l'ephe taa nopyabedu l'eka Chileke doberu phe g'ephe nodu; bya agbado eka a suru g'ephe buru l'imigwe bẹ Chileke tukwaru mkporo mgbe-abvu-abvu; chiru phe ye l'ejo ochii eka gbahuru tsukiribaa. Ọ buru eka ono bẹ ephe a-nodu jasụ l'oke mboku ono, bu mboku, Chileke e-kpe phe mpfugbu ono. <sup>7</sup> Nokwapho g'ọ nwuru Sodomu yee Gomora; mewaro iphe, bukpo mkpukpu lẹ mkpukpu ono, ephe l'ephe naru onu-egu ono. Ephebedua wokotakarupho onwophe togboru eme ke nwanyi me eme iphe, bukpo ebyi, adudu k'epfufu. A nua phe aphu k'ojejoje. Iphe ono buru iphe, Chileke gude alọ ndiphe l'ophu eka lẹ nchi.

<sup>8</sup> Sụ-a; nokwapho g'ọo-du ndu ono, ezi iphe, abudu okpobe-opfu ono. Ephe arwoje nrwo, emeje ephe emerwushia onwophe; ndu-ishi nodu aduje phe ashi; ephe nodu anoduje epfubyishi ndu ono, a ta ahumadu l'enya l'ogbu-nwinwii imigwe ono. <sup>9</sup> Epfubyishi ono, ephe epfubyishi ndu ono ta adukwa g'ọ ka mma l'ọo Mayikelu, bu onye-ishi unwu-ojozi l'imigwe turu iya ama ememe. Mbu lẹ teke ono, Mayikelu ono yee Nsetanu turu ego onye a-pata odzu Mosisu ono bẹ Mayikelu 'atukwaru ama ephu Nsetanu iphu; g'e-shi gẹ ya nma iya ikpe. Iphe, o pfuru Nsetanu buepho: "G'ọ buru Nnajiuphu a-baru ngu mba." <sup>10</sup> Ndu ono bu iphe, te edoduru phe enya bẹ ephe anoduje epfubyishi. Ephe du g'anu-egbudu, enwedu egomunggo, buepho iphe, agu iya nu

bẹ ọomajeru; tẹme ọ buerupho iphe ono bẹ oomeje. Nokwapho gẹ ndu ono emeje bu ono. Ọo iphe, agụ phe nụ bẹ ẹphe anọduje eme; ọ bụru iya l'e-gbu phe. <sup>11</sup>Nshio phe! Ọo ẹjo ọzo ono, Kenu tsoru teke ndiche ono bẹ ẹphe etsokwapho. Mbu-a; ndu ọwa-a bukwa ẹkpiri okpoga bẹ kparu iphe, ẹphe shisweru ọzo ono, pfuru nhamunha ono; bya emeahaa iphe ono, Belamu meru teke ndiche ono. Mbu ọ bụru gẹ Kora kwefuru Chileke ike bu g'ẹphe wataru ememe. Ẹphe jekwanu ala l'iswi g'ọ laru. <sup>12</sup>Ọobujeru; ẹphe -bya anọ-kube unu; eri nri l'eka unu dokoberu tugba nri eri gude egoshi l'unu yeru nwibe unu obu; ẹphe aburu iphe-iphere nọdu l'echilabo unu. Ọphu iphere onwophẹ adujedu phe; l'ọ buepho onwophẹ bẹ ẹphe letaru ẹnya. Ẹphe du g'urwukpu, pherephere zikashiru; egube-a igwe erwuchaa erwurwu; pherephere ezikaa ya; igwe te edzeedu mini-a. Ẹphe du g'oshi-omi; ọle ọ kwa ọphu ata amijedu mebyi teke ọ gbaru iya l'amị mebyi. Ẹgube ndu ono bẹ ọnwu gbuwaru l'ono-ndzu; ọ to buledua akpo anwuhu lanu bẹ ẹphe nwuhuru; noo kele e phefuwaru phe tuphaa g'eephefuje oshi-a. <sup>13</sup>Ẹphe dukwapho g'akpara-mini, ha shii, l'atu l'eze-enyimu. Noo kele ẹphe aphukpotaje ẹjo umere, rehuru erehu ono, ẹphe eme ono g'eka uphu mini bulihuru. Ẹphe du gẹ kpokpode, ephu ọzo. Ọle ẹka Chileke doberu kwaberu phe bukwanu tsukiribaa ẹka agba ẹjo ọchii. Ọ bụru ẹka ono bẹ ẹphe a-nọdu jasu lẹ tuutuutuu lẹ mimiimii.

<sup>14</sup> Ọ kwa Inoku, bu onye ogbo k'esaa l'eri Adamu bẹ pfuru mpfuchiru ke ndu ono su: "Unu lenu; Nnajiuphu bẹ yee ndu nkiya, du unubuku ugbo iri shikwa l'imigwe swiru abya; <sup>15</sup>g'ẹphe bya ekpee ndiphe g'ẹphe ha ikpe. Oo-goshikota iphe, bu ndu ono, ata madu Chileke ono iphemiphe, ẹphe meru iya, bu iphe-ẹji; l'oo-gude

emeswe ono, ẹphe mesweru iya ono nmaa phẹ ikpe l'ẹphe ta akwabẹduru iya ùbvù; bya anmakwa phẹ phọ ikpe iphe, bụkpoo ẹjo opfu, ẹphe gude pfubyishia ẹpha iya.”

<sup>16</sup> Ndu ono abụjeru; iphe -byaru phẹ; l'ọ bụerupho Chileke bẹ ẹphe anọduje ata ụta iya; mbụ-a; iphe -byaru phẹ; ẹphe agbẹ wata aguru Chileke aphụ iya. Ẹphe eworu onwophẹ tọgboru ẹgu ẹjo-iphe, agụgbabe phẹ nụ. Iphe, eshije phẹ l'ọnu bụerupho aja onwophẹ mkpọkoro ajaja. Ẹphe -hụmakpowa l'o nweru urwu, ẹphe e-rita nemadzụ l'ẹka; ẹphe ajakpọshikpoepho onye ọbu.

*Anma* ọkwa mẹ iphe, ee-meje

<sup>17</sup> Ọle ọ bụ; ndu mu yeru obu; iphe, mu eme g'unu maru bụ; unu nyatajẹepho iphemiphe ono, ndu-ishi-ozì Nnajiuphu anyi Jizọsu Kéreshi vuhawaa ụzo pfuaru unu ono. <sup>18</sup> Mbụ iphe ono, ẹphe shi anọduje aguru unu l'ọgu ebvu ono, bụ iya bụ: “L'o -rwujẹepho teke mgboko-a l'a-bvụ bẹ o nwechaaru ndu a-nọdu aja unu ewenu. Iphe, ẹphe a-nọdujẹepho awoko ẹka iya bụ g'ẹphe e-shi mee iphe, ẹgu iya enwu phẹ phuruphuru l'ẹhu; mbụ iphe, ẹgu iya agụ phẹ; opfu l'ẹphe ta akwabẹdu Chileke ùbvù.”

<sup>19</sup> Ndu eme ẹgube ono bẹ l'akpatajẹ g'ọgbo bua onwophẹ ẹbo; wata akpa iche iche. Ọ kwa ẹgu iphe, dụ lẹ mgboko-a, l'agụ phẹ nụ bẹ kpụ phẹ l'ẹka; ọ tọ bụkwa Unme-dụ-Nsọ gude ndzụ phẹ. <sup>20</sup> Obenu lẹ-a; unubẹ ndu ọphu mu yeru obu; unu pfụekwarupho pfushia ike l'ekwekwe ono, dụ iche ono, unu kweru ono; mbụ ekwekwe ono, shi Chileke l'ẹka ono. Unu gude ekwekwe ono vuje evuvu. Unu hajẹ gẹ Unme-dụ-Nsọ goshije unu g'unu l'e-gudeje epfu anụ Chileke. <sup>21</sup> Unu nọpyabeekwapho lẹ nyemobu Chileke; unu anọdukwapho ngabẹru Nnajiuphu,

bụ Jizọsu Kéreshi g'ọo-phụaru unu obu-imemini; mek-waaphọ g'unu nọdu ndzụ ojejeje.

<sup>22</sup> Unu phujekwaru ndu abọkwadu obu ẹbo obu-imemini. <sup>23</sup> Ẹgube ndu ono bẹ unu e-yetajeru ẹka; lọfuta phẹ l'ọku. Unu aphujekwaru phẹ phọ obu-imemini; mbụ ndu ono, bụ ẹgu ẹjo-iphe agụ phẹ nụ bẹ gude ndzụ phẹ ono. Ọle-a; unu ta akwaswejekwaru phẹ ẹnya mẹ unu -nọdu aphuru phẹ obu-imemini ọbu. Iphemiphe, bụ nkephẹ bẹ unu a-kpọkotajekwa ashị; mbụ je akpachaa l'uwe, ẹphe eye l'ẹhu, bụ ọphu ẹphe gudewaa ẹjo-ememe phẹ pharwushia.

*Ajaja bụ kẹ Chileke*

<sup>24</sup> G'anyi tua Chileke ẹpha; mbụ onye ono, a-dụ ike gudeshia unu g'unu ta ada; tẹme ọ bụkwaru iya phọ l'e-me g'ọ tọ dụ iphe, aa-ta unu ụta iya teke oo-kuta unu dobe l'ọdu-biribiri iya. Ẹka ono bụ ẹka ẹhu a-nọdu atsọwaro unu ụtso. <sup>25</sup> G'anyi tua ya ẹpha l'ọo ya kpoloko kpẹekpu bẹ bụ Chileke. Ọ bụru l'ẹka Nnajiuphu anyi, bụ Jizọsu Kéreshi bẹ oo-shi dzọo anyi. G'ọdu-biribiri mẹ abụ. Ọkalibe, kangoru nụ; mẹ ike; mẹ abụ ishi, bụhakpoda nkiya tẹme mgboko dụ; bụru nkiya nta; bụkwarupho nkiya jasụ lẹ tuutuutuu lẹ mịimiimii. Nokwa g'ọ dụ.

Bayıburu Izii  
Izii: Bayıburu Izii Bible

copyright © 2014 Wycliffe Bible Translators, Inc.

Language: (Izii)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 30 Dec 2021 from source files dated 30 Dec 2021

c6885c7c-c550-5b8b-a4fe-4bd714af4f6d